

027 太極真人說二十四門戒經

經名：太極真人說二十四門戒經。撰人不詳，約出於隋唐。言齋戒日期及二十四戒。一卷。底本出處：《正統道藏》洞真部戒律類。

爾時元始天尊，先天地生，布炁十方，成就萬象。人天之主，河嶽之君，日月因之以運行，四時稟之以成像。作修道梯航，爲生死津梁。出有入无，應時方便，隨緣設教，濟度蒼生。爲作法身，周徧天下，成一切智，起無邊心。或作帝王身，或作宰官身，或作郎吏身，或作出家身，或作法師身，或作龍王身，或作男子身，或作女人身，或作乞士身，或作下賤身。種種形變，隨順世間，肉眼凡夫，不能見我。以不識

故，多生顛倒，是非人我。貪癡因隨愛欲生，從執著起，便生地獄，結成冤家。從生至生，從劫至劫，不曾覺悟正念，身心未入定源，起離虛假，沈淪惡道，漂浪愛河，被業風吹，豈能正定？三業自種，十惡心生，於正法中，盡作分別，永沈苦海，解脫無緣。常念衆生苦惱無量，我今傳戒，止惡防愆，能自依行，是成道果。

太極真人又曰：我前五百生中，發念修道，見一切法，無非真法。何以故？不以假見故。知一切法，無有非真。何以故？以真知故。故知假者見假，真者見真，但作真心，即是真智。真不離假，變假還真；假不離真，妄真成假。但能斷假歸真，戒成如說奉行，晝夜讀誦，自無地獄，皆證天堂。凡念戒時，每月一日、八日、十四日、十五日、十八日、二十三日、二十四日、二十八日、二十九日、三十日，月小却取二十七日，此名十直齋日。立春日、春分日、立夏日、夏至日、立秋日、秋分日、立冬日、冬至日，此名八節齋日。正月

十五日、七月十五日、十月十五日，此名三元齋日。正月一日、四月一日、七月一日、十月一日，此名四始齋日。正月七日、七月七日、十月五日，此名三會齋日。如此等日，同業共行，修道戒人，或少或多，同居靜室，清齋讚唱，念誦燒香；或在觀中，名爲福地，掃洒房院，即是玄壇，能屈法師，誦我妙誡，燒衆妙香。是時即有左右官使者、三十二天真仙帝君、十方靈官、五嶽將吏、九州社令、山林孟長、水府靈祇、十二溪女、飛天神王、諸天童子、無鞅數衆，一時同會念誡之所。錄其功德，記發心人。當必爲之削除罪業。若能堅固抄寫受持，每能念之，劫劫生生，不墮地獄。真人說諸戒偈，我今衆等，深心慚愧，各各受持，唯願戒師，時時爲說。

第一誡者，不得殺生、割斷他命，煎煮美味，以饒一身。或自殺、教他殺、見殺隨喜，噉食衆生。犯者過去，受鑊湯地獄罪。

第二誡者，不得偷盜，取非義財，夜入人家，晝窺園圃，承其便勢，遂起

賊心。或自偷、教人偷、見偷隨喜。犯者過去，受刀山、劍樹地獄罪。

第三誠者，不得心懷陰謀，枉陷良善。見人勝己，便欲害他，計較不平，自求饒益，他好我認，我惡怨他。犯者過去，受爐炭地獄罪。

第四誠者，不得口是心非，鬥亂親戚，談說三寶，讒謗出家。走作唇舌，非笑良善，誹謗聖教，疑惑兩心。說語不平，勸生分別。犯者過去，受鐵犁耕舌地獄罪。

第五誠者，不得違經慢道，欺誘他人，敗壞靈壇，侵損常住，隱沒功德，踐踏福地。犯者過去，受剉碓剉身地獄罪。

第六誠者，不得飲酒。醉亂心神，凶橫無度，不存禮樂，喧悖尊親，叫喚神靈，驚心損氣。犯者過去，受毒蛇食心地獄罪。

第七誠者，不得妄言綺語，惡口兩舌。罵詈尊親，毀辱師長，善言惡對，轉為怨讎。犯者過去，受鎔銅灌口地獄罪。

第八誠者，不得行邪心曲，耽姪愛色，執著生迷，離他恩愛，奪人寵念，隔絕他家。犯者過去，受抱銅柱地獄罪。

第九誠者，不得慳貪吝惜財物，自求饒益。妬妬他人，呪詛一切，更相猜忌，彼此怨深。犯者過去，受鐵輪地獄罪。

第十誠者，不得破齋破戒，不孝不仁。偷竊齋食，隱沒厨供，令彼功德使不周圓。犯者過去，受運石培山地獄罪。

第十一誠者，不得毀拆尊像，偷竊幡花，自將供養，充衣裳卧具。犯者過去，受卧鐵床地獄罪。

第十二誠者，不得見功德破壞，屋舍傾崩，不好修營，心懷虛過。犯者過去，受劍林割切身心地獄罪。

第十三誠者，不得因到人家、見他有物、便即貸借、方便不還。羅織貧窮，非理逼奪。犯者過去，受寒冰地獄罪。

第十四誠者，不得見人有憂心生歡喜，見人苦惱心即快他，見人有財常

思下脫，見人好心常自憎嫌。犯者過去，受鐵釘釘身、身生猛火地獄罪。

第十五誠者，不得不洗手漱口，直進道場，侵觸經像，穢污靈文。心不恭敬，多生懶慢。犯者過去，受鐵杖亂考地獄罪。

第十六誠者，不得採巢破卵，傷胎墮子，非理枉橫，截斷生路。犯者過去，受大石壓身地獄罪。

第十七誠者，不得裸形露體於天地日月星辰之下，三明六昧之中。犯者過去，受鐵錐刺身地獄罪。

第十八誠者，不得耗蠹常住，攀摘花果，損折園林，穢污觀舍。不生慚愧，是輕福地。犯者過去，受吞鐵丸地獄罪。

第十九誠者，不得雜食葷辛，葱蒜韭薤，身中臭穢，神靈不居。念誦修持，觸犯靈聖。犯者過去，受吞火食炭地獄罪。

第二十誠者，不得自以為是，非笑他家，於諸法中橫起人我，執心自著，不見正真。犯者過去，受磔磨碓擣地

獄罪。

第二十一誠者，不得將諸毒藥方便施人，損他性命，每結怨嫌。犯者過去，受百毒惡汁、灌煮身心地獄罪。

第二十二誠者，不得計筭三寶，離隔六親，不念捨施，唯求自饒。言作兩心，不行一信。犯者過去，受拔舌地獄罪。

第二十三誠者，不得將齋食就葷辛酒肉相和共食，不敬齋法，諸天罰人。犯者過去，受鐵鎖鎖身、不得託生地獄罪。

第二十四誠者，不得自倚豪強，欺誘貧賤，離拆男女，不信天真。生兩見心，不斷人我，自行非去，不識罪因。犯者過去，受鋸解身心地獄罪。

太極真人又曰：此二十四門誠者，身之大患。犯者鋒刀萬劫，常考生魂。凡人或遍身楚痛，或身自青赤，心懷憂愁。此是生魂冥司將考，當須各隨力分，燒香入齋，行道禮懺，持心受誠，念无上天尊，布施然燈，廣造功德，更無再犯，其罪必除。

真人又曰：凡欲學道，先須齋戒，

洗心防患。持戒功德多於微塵。微塵之數，見而可量；齋戒之功，无窮无盡。一人持戒，九祖生天，合家蒙恩，臨難分解。縱盡家產已將布施，還須持此戒經。若學道不持此戒，終各不成就。能持此戒者，即有諸天帝王、天真大聖、神仙玉女、无極世界一切靈司，燒香然燈，證持戒者得福无量。尅成道真，諸天香花因便迎接，必將此輩隨願往生。若善男子、善女人聞此戒經，心生歡喜，惡業便除。能捨慳貪，將清淨財贖所傳經戒，發起回向，持心精勤。若爲亡人臨送之家，或經初七，乃至終七，持誦此戒，即得魂飛淨境，託生天堂。懷妊婦人聞此戒經，臨難分解，若爲己身厄難，消除苦緣，闔家得福无量。戒約煩惱，隔絕魔心，努力勤修，早求解脫。諸天同唱，而說偈言：

一切修學人，誓願成真道。慈悲念誠文，隨聲斷煩惱。永離生死苦，得成无上道。歸心向正真，紅顏不衰老。

太極真人說二十四門戒經

（陳咏明點校）